



Broj: 03/1-50-14-7-27/16

Sarajevo, 22.6.2016.

PREDMET: Učešće članova Zajedničke komisije za odbranu i sigurnost BiH na 4. Parlamentarnom obavještajno-sigurnosnom forumu, Beč, 20. i 21.6. 2016.

U Beču je 20. i 21.6.2016. održan Četvrti parlamentarni obavještajno-sigurnosni forum na kojem su učestvovali: Sifet Podžić, predsjedavajući, Borislav Bojić, prvi zamjenik, i Borjana Krišto, druga zamjenica predsjedavajućeg Zajedničke komisije za odbranu i sigurnost BiH.

Učesnicima ovog foruma su se u uvodnom dijelu obratili: Werner Amon i Andreas Karlsbock, predstavnici Parlamenta Austrije te kongresmen SAD Robert Pittenger, predsjedavajući Kongresne radne grupe za borbu protiv terorizma i nekonvencijalnog naoružanja, na čiju inicijativu se i održava ovaj forum.

Tokom Forumu razgovaralo se o brojnim sigurnosnim izazovima u svijetu, borbi protiv terorizma, finansiranju terorističkih aktivnosti, pranju i nedozvoljenim putevima novca, korupciji te prevenciji u zaštiti građana i infrastrukture.

Veoma zapaženo izlaganje su, osim uvodničara, imali: general Ben Hodges, komandant američkih vojnih snaga u Evropi, te ministar unutrašnjih poslova Republike Austrije Wolfgang Sobotka koji su učesnike Forumu pozvali na saradnju u prevenciji i suprotstavljanju aktuelnim sigurnosnim izazovima, posebno opasnostima koje sa sobom nose teroristički akti koji su u zadnjih nekoliko godina počinjeni širom svijeta, a imali su nesagledive posljedice.

Učesnicima Četvrtog parlamentarnog obavještajno-sigurnosnog foruma obratili su se i brojni stručnjaci koji se bave problematikom koja je predmet rasprave na Forumu te čelni ljudi sigurnosnih i obavještajnih agencija, parlamentarnih tijela, banaka i kompanija koji su izložili postignuća, pozitivne prakse i probleme u prevenciji terorističkih aktivnosti, pranja novca i korupcije.

U dijalogu, koji su vodili predstavnici parlamenata i parlamentarnih tijela Austrije, Evrope, Južne Amerike i SAD-a sa stručnjacima koji neposredno i operativno rade na praćenju procesa i aktivnosti koje čine teroristi, ekstremističke organizacije i militantne grupe došlo se do niza saznanja koja obavezuju zakonodavnu i izvršnu vlast, te subjekte sigurnosnog i obavještajnog sektora na kontinuiranu prevenciju i aktivnost u kojoj praktično nema prostora za čekanje. Neophodno je prilagođavati postojeća i osmišljavati nova zakonska rješenja.

Očito je da su potrebna i dodatna novčana ulaganja u ljude i opremu koja je u skladu s novim postignućima. Preporuka je da parlamenti i vlade zemalja učesnica prilagode svoje nacionalne strategije u borbi protiv terorizma, ekstremizma i pranja novca te da se koordiniraju aktivnosti, prije svega na nacionalnom i regionalnom nivou, a potom i šire.

Tokom drugog dana boravka u Beču, delegacija Zajedničke komisije boravila je u radnoj posjeti Ambasadi BiH u Beču.

Tom prilikom ambasador BiH u Republici Austriji Tomislav Leko i Nikola Đukić, savjetnik, sa osobljem Ambasade te osobljem OSCE-a, Ureda UN-a i drugih međunarodnih organizacija u Beču, Marijana Zubonja, ministar savjetnik i brigadir Slobodan Tanasilović, vojni ataše BiH i vojni savjetnik u Austriji, informirali su članove ZK o bilateralnim odnosima BiH i Austrije, mogućnostima unapređenja saradnje na polju ekonomskih odnosa, kulture i niza drugih sadržaja koji se nude Bosni i Hercegovini.

Predstavnici BiH u OSCE-u, Uredu UN-a i drugih međunarodnih organizacija u Beču su tokom susreta s članovima Zajedničke komisije prezentirali pregled aktivnosti BiH sa OSCE-om i UN-om, aktuelno stanje u ispunjavanju vojno-političkih obaveza prema OSCE-u i UN-u, kao i mogućnosti koje se pružaju u saradnji sa zemljama članicama OSCE-a, posebno tokom ove i naredne godine kada OSCE-om predsjedavaju SR Njemačka, odnosno Austrija, koja preuzima predsjedavanje 2017. godine.

Predsjedavajući Zajedničke komisije

Sifet Podžić

